

# AU LEOLEO 2020



*'Ia Tatalo ma Mataala'*

## UPU TOMUA

O paia o Samoa mai Saua seia pā'ia le fafa o Saualii, e le toe afea i se matou faamatalaga, auā o paia mai le vavau e o'o atu i le faavavau.

E avea lenei avanoa fa'auro matou te momoli atu ai le fa'amalo ma le faafetai i le paia ma le mamalu o lo tatou Ekalesia. Ua fa'amalo le folau mai lena tausaga ua tuana'i atu. O lenei ua tatou taunuu mai i lenei tausaga fou i le manuia ma le filemu o lo tatou Leoleo Sili. Malo le malaga manuia! Ma, e ao lava ona tatou momoli laau i fogaa; o le viiga ma le faafetai i lo tatou Atua, auā o ia o le Mataisau o mea uma; o lona alofa foi ma lona faamaoni sa tautoaluaaina ai lo outou soifua ma si o matou ola, ua tatou tuvae mai ai i lenei tausaga fou, i lona filemu ma lona manuia.

O lo tatou faataunuuina o lenei sauniga faale-'Au Leoleo, e eseese lava. Ma, e mafua lea ona o le musumusuga a le Agaga Paia, ina ia faia pea mea sili e faatonu folau ai lo tatou soifua tapuai i le Atua. O le mea lea, a o tatou faimalaga i lenei tausaga, ua valaauina tatou ina ia faamalolosi ma tutumau i le tatalo e le aunoa. Tatala outou finagalo ma tetepa a'e mata faaleagaga i le faaali mai o le Atua e le aunoa, ina ia manino ai pea ia i tatou lona finagalo. O la tatou faiva alofi i lima faale-'Au Leoleo, o lo tatou mataala faatasi lea ma le Leoleo Sili, ina ia to mai manū mo ana feau ma galuega o lenei tausaga.

O le susuga i le Toeaina ia Siasage Siamu ma le 'aufaigaluega o le Pulega Santa Clara sa saunia le tusi ta'iala o lenei tausaga 2020, e fesoasoani ai i le 'au fai tatalo o lo tatou Ekalesia. Malo le tauata'i.

Ia manuia faiva ma mafutaga a le 'Au Leoleo i lenei tausaga i le faatasi mai o le Agaga Paia, Amene.

Tautalatasi P Fanolua FT, *Peresitene*  
Mafutaga 'Au Leoleo EFKAS

## **IANUARI 4, 2020**

Tusi Faitau: Iosua 3:1-6

Matua: Iosua 3:4 - *“Ina ia outou iloa le ala tou te ui ai, auā e lei uia e outou lenei ala anamua.”*

Manatu Autu: **“O LE ALA FOU MO LE NU’U O LE ATUA”**

Tatou Faafetai i le Atua: -

1. I ona aao alofa ua manuia ai la tatou folauga mai lena tausaga e aulia lenei tausaga fou.
2. I lona le taofia o se mea e tasi ua silafia e tatau mo i tatou i aso taitasi.
3. I lona faailoa mai pea o le ala tatou te ui ai e saogalemu ma manuia ai.

Tatou Faatoese i le Atua: -

1. Ona ua tatou le faalogo i lona siufofoga o loo fetalai mai pea.
2. Ona ua tatou filifili i le ala faigofie ma le lautele e i’u i le malaia.
3. Ina ua tatou mumusu i le ala o Keriso ona e tau i le faalumaina ma le matagā o le satauro.

Tatou Tatalo i le Atua: -

1. Ia faapa’iaina lana Ekalesia i lana folauga i lenei tausaga fou i ona tiute ma faiva feagai ai.
2. E ui e fou le tausaga, fou le ala, a ia pupula mai pea ona lava fofoga i luga ia i tatou ma agalelei mai ia i tatou.
3. Ia faatupuina pea le olioli i o tatou loto e savavali i ona ala.

## **IANUARI 11 – FAAILOA LE ALII E ALA I LONA PAPATISOGA**

Tusi Faitau: Mataio 3:13-17

Matua: Mataio 3:17 - *“Faauta foi, o le siufofoga mai le lagi, ua faapea mai, “O lo’u Atalii pele lena, ua ou fiafia lava ia te ia.”*

Manatu Autu: **“O LE PELE A LE TAMĀ”**

Tatou Faafetai i le Atua: -

1. Ona o le fou pea o ana meaalofa mo i tatou i lea taeao ma lea taeao.
2. I lona agalelei tele ua oo vave mai ai lona alofa lavea’i mo i tatou, a o mamao lava i tua lona to’asa.
3. Ona o le soifua o Keriso le Pele a le Tamā ua fiafia i ai lona finagalo, ua fai ma fa’aaaoa mo e faatuatua.

Tatou Faatoese i le Atua: -

1. Ona ua tatou fefefe e la’a i le faatuatua e faataunuu mea tonu.
2. I lo tatou faatamala i tiute ma galuega ua valaauina ai i tatou.
3. Ona ua tatou le faalagolago i le Agaga ua fai ma o tatou fesoasoani sili.

Tatou Tatalo i le Atua: -

1. Ia saunia pea le Ekalesia e tala’i le salamō ma liliu ese mai le agasala.
2. Ia maua le lototele e le Ekalesia e faataunuu ai mea tonu uma e tusa ma le finagalo o le Tamā.
3. Ia avea i tatou uma ma fanau e pele i le Atua, ma fiafia i ai lona finagalo.

## **IANUARI 18 – VAIASO SA LONA LUA O LE VAITAU O LE EPIFANIA**

Tusi Faitau: Isaia 49:1-6

Matua: Isaia 49:6 - *“Ua ou avatua foi oe e fai ma malamalama o nuu ese, e fai ma’u faaolataga ia oo i tuluiga o le lalolagi.”*

Manatu autu: **“FAAILOA LE MALAMALAMA O LE ATUA I NUU ESE, MA LANA FAAOLATAGA I LE LALOLAGI”**

Tatou Faafetai i le Atua: -

1. Ona o le malamalama o le Atua ua oo mai i o tatou tagata ma tatou iloa ai lona finagalo.
2. I le valaauina pea o lana Ekalesia e faasusulu atu le malamalama o le Atua ma faailoa lana faaolataga i tagata uma.
3. Ona o Keriso, le malamalama moni o le lalolagi ma le ala i le faaolataga.

Tatou Faatoese i le Atua: -

1. Ina ua tatou tuu le malamalama o Keriso, ae faasusulu lo tatou lava iloa ma lo tatou lava malamalama i tagata.
2. Ina ua mamao i tatou ma le ola fa’auauna puapuagatia na faatino i le soifua o Keriso.
3. Ona o mea tutupu i le lalolagi ua atagia ai le tetele o galuega a le pouliuli, ae le o le malamalama o le Atua.

Tatou Tatalo i le Atua: -

1. Ia fa’auupegaina pea lana Ekalesia e faailoa le malamalama o le Atua i tagata uma, ma lona alofa e ala i lana faaolataga.
2. Ina ia a’oa’o mai pea le Ekalesia ia lototele i lona valaauina fa’auauna puapuagatia e fai ma molimau mo le Atua i le lalolagi.
3. Ia tatou loto atu i mea uma e finagalo i ai lo tatou Atua e ala i le musumusuga a le Agaga.

## **IANUARI 25 – VAIASO SA LONA TOLU O LE VAITAU O LE EPIFANIA**

Tusi Faitau: Mataio 4:12-23

Matua: Mataio 4:19 - *“Ona fetalai atu lea o ia iā te i laua, ‘Ina muli-muli mai ia iā te au, oute faia oulua ma fai faiva i tagata.’”*

Manatu Autu: **“VALAAU E MULIMULI IA IESU”**

Tatou Faafetai i le Atua: -

1. I faamanuiaga e tele mo i tatou, e oo lava i lana valaau mo soo se tasi e lagona ma usita’i.
2. I lona valaauina pea o le tagata agasala ma le femoumoua’i mo galuega o lona Malo.
3. Ona o lana valaau, e aumai ai ma meaalofa ma auupega e faatino ai.

Tatou Faatoese i le Atua: -

1. I lo tatou faaoga sese o lo tatou valaauina e saili ai o tatou mamalu.
2. Ina ua faamoemoe i lo tatou iloa masani, ae le usitai i le Upu a le Alii.
3. Ina ua tatou manatu e faalelalolagi le Malo o le Atua ma lona faamoemoe.

Tatou Tatalo i le Atua: -

1. Ina ia maua le potō faakeriso e i tatou uma ua talia le valaau a le Alii e mulimuli atu ia te ia.
2. Ia tatou fa'aaoga tatau meaalofa ua foaiina mai e faalatele ai tuaoi o le Malo o le Atua.
3. Ia tatou maua le loto maulalo e vivii ai i le Atua i le valaauina o i tatou ae le o agelu mo galuega o le talalelei.

## **FEPUARI 1 – VAIASO SA LONA FA O LE VAITAU O LE EPIFANIA**

Tusi Faitau: 1 Korinito 1:18-31

Matua: 1 Korinito 1:31 - *“Ina ia faapei ona tusia, “O lē mitamita, ia mitamita o ia i le Alii.”*

Manatu Autu: **“IA TAU O LE ALII E MITAMITA AI”**

Tatou Faafetai i le Atua: -

1. I le potō o le Atua ua foaiina mai pea e sui ai lo tatou valea.
2. Ona o tatou manatu, e le o ona manatu ia; ma o tatou ala, e le o ona ala ia.
3. Ona o Keriso ma lona satauro ua fai ma mea e mitamita ai le ‘au Kerisiano.

Tatou Faatoese i le Atua: -

1. Ina ua avea lo tatou potō ma ala ua lilo ai le Atua i tagata.
2. Ina ua le faalagolago le Ekalesia i le potō mai luga e sili lea.
3. Ina ua tele lo tatou mitamita i mea a lalo nei, ae galo Keriso.

Tatou Tatalo i le Atua: -

1. Ia foaiina mai le potō i lana Ekalesia e faatino ai ana galuega.
2. Ia fai Keriso ma mitamitaga sili o le au Faatuatua, ma faaa'oa'o i lo latou soifua galue.
3. Ia maua le loto maulalo ae le o le faafefeteina i le aufaigaluega galulue o le Talalelei.

## **FEPUARI 8 – VAIASO SA LONA LIMA O LE VAITAU O LE EPIFANIA**

Tusi Faitau: Salamo 112

Matua: Salamo 112:5 - *“E manuia le tagata ua alofa fua, ma tuuina atu ana mea i e nono mai; na te tausia ana mea ma le faautauta tonu.”*

Manatu Autu: **“E MANUIA LE TAGATA UA AMIO ATUA”**

Tatou Faafetai i le Atua: -

1. I le malosī ma le ola maua pea e o tatou tagata i lea aso ma lea aso.
2. I le tele o faamanuiga ua tatou maua e ui ina le tusa ma o tatou tagata faaletonu.
3. I le faaolataga ua saunia e Keriso mo i tatou ma le lalolagi atoa.

Tatou Faatoese i le Atua: -

1. I lo tatou faia pea o le agasala ma le mautinoa e tele pea le alofa o le Atua ia i tatou.

2. I lo tatou faamaualuga i o tatou manuia e iloa ai o tatou ua tonu.
3. I lo tatou tau mamao i le sailiga o le Malo o le Atua ma lana amiotonu, ona ua seetia i le matagofie o le lalolagi.

Tatou Tatalo i le Atua: -

1. Ia manino ia i tatou o manuia o le Atua e fai mo e ua amio Atua.
2. Ia faailoa mai pea i lana Ekalesia e maua Keriso i e fia aai ma e matitiva ina ua alofa i ai.
3. Ina ia avea lo tatou amio Atua ma molimau e liliu ai e ua amio leaga.

## **FEPUARI 15 – VAIASO SA LONA ONO O LE VAITAU O LE EPIFANIA**

Tusi Faitau: Mataio 5:17-20

Matua: Mataio 5:20 - *“Auā ou te fai atu ia te outou, ‘A le sili la outou amiotonu i la le au Tusiupu ma le au Faresaio, e le sao atu lava outou i le malo o le lagi.’”*

Manatu Autu: **“O LE AMIOTONU E SAO AI I LE MALO O LE LAGI”**

Tatou Faafetai i le Atua: -

1. I lana Afioga Pa’ia o loo faamalieina ai pea lo tatou matelāina ma lo tatou galala faaleagaga.
2. I le galuega a le Agaga e a’oa’o uiga o Afioga a le Atua mo i tatou.
3. I lona saunia pea o tatou loto e talia lana upu e ola ai.

Tatou Faatoese i le Atua: -

1. Ona ua manatu le tagata e sao i le malo o le lagi i mea lelei na te faia.
2. Ona ua vaivai le Ekalesia e faamalamalama le amiotonu e finagalo i ai le Atua mo le tagata.
3. Ona ua le anaana tagata i le finagalo o le Atua, a ua tausisi atu i ala o le tulafono e tauamiotonuina ai.

Tatou Tatalo i le Atua: -

1. Ina ia faailoa mai pea le amiotonu a le Atua i lana Ekalesia.
2. Ina ia ola lana Ekalesia i le fai o le amiotonu, naunau i le alofa, ma feooa’i ma le Atua ma le loto maulalo.
3. Ia fai le malo o le lagi ma fiafiaga o le au Kerisiano uma lava.

## **FEPUARI 22 – FAAILOA LE ALII I LONA MAMALU UA PUPULA MAI**

Tusi Faitau: Mataio 17:1-8

Matua: Mataio 17:2 - *“Ona liua ai lea o ia i o latou luma, ua pupula mai ona fofoga e pei o le la, ua sisina mai foi ona ofu e pei o le malamalama.”*

Manatu Autu: **“O LE MAMALU SILISILI ESE O LE ALO O LE ATUA”**

Tatou Faafetai i le Atua: -

1. Ona o lona aao ta’ita’i ua saogalemu ai pea i tatou i faalavelave e tutupu mai.
2. I le tele pea o lona alofa tunoa e ufiufi mai i o tatou faaletonu.

3. I faaaliga o lona matagofie e ala i lona Alo pele o Iesu Keriso.

Tatou Faatoese i le Atua: -

1. Ona o le vave fulitua o i tatou i lona finagalo, e ui i le tele pea o lona alofa mai.
2. Ona o le tele o taimi ua ola le Ekalesia mo ia lava, ae le mo le lalolagi ma faafitauli o aafia ai tagata.
3. Ona ua apo tasi e le au Faatuatua le Keriso faaecaina ma lona mamalu ua pupula mai, ae faatuatuana'i le Iesu o aso faiso'o.

Tatou Tatalo i le Atua: -

1. Ina ia faama'ite ia i tatou le agaga o le ola i le alofa, ma lana upu moni ia latalata i o tatou fatu.
2. Ia foa'i mai le malosi ma faafou o tatou lagona ia tumau ai pea i ona ala.
3. Ia fesoasoani mai lona agaga ia maua le lototele e faapea atu ai i faaosoosoga e afaina ai, "LEAI!"

## **FEPUARI 29 – O LE TOLU O ASO O LE VAITAU O LE LENI**

Tusi Faitau: Ioelu 2:12-17

Matua: Ioelu 2:13 - *"Ia outou saeia o outou loto, a e le o outou ofu, ma toe foi i le Alii lo outou Atua; auā e alofa fua, ma alofa mutimutivale o ia, e tele gese lona toasa, ua tele foi lona alofa, e salamō ia ona o le leaga."*

Manatu Autu: **"TOE FOI I LE ALII LOU ATUA MA LE LOTO ATOA"**

Tatou Faafetai i le Atua: -

1. I ana faamanuiga ia i tatou, o tatou aiga, lo tatou atunuu, uō ma o tatou tuaoi.
2. I le matagofie o lana foafoaga; i fanua ma atu mauga lanu lau'ava o si o tatou atunuu, i le lanu moana o le sami ma le vanimonimo ua faaalialia ai lona mamalu.
3. I lona tuu avanoa mai pea i le tagata e toe fo'i atu ma le loto salamo.

Tatou Faatoese i le Atua: -

1. Ona ua tele pea taimi o tuitui mai le Alii i faitotoa o tatou loto, a ua le tatalaina atu.
2. Ona ua tatou le faamagalalo atu i e ua ita mai, a ua faamagalalo mai i tatou o ita ia te Ia.
3. Ona o upu ua tatou lafo ua afaina ai nisi, ma ua le filifili i tatou i ala o le amiotonu e pei ona ia finagalo i ai.

Tatou Tatalo i le Atua: -

1. Ia aapa mai ona aao alofa e faamāmā avega ua taomia ai lo tatou ola taumafai.
2. Ia tatou lagona pea lona faatasi mai, lona galue mai, ma lona faamanuia mai, e ui i lo tatou masalosalo.
3. Ia faatumu o tatou loto i le faamoemoe o mea lelei o lenei aso fou, ma le talitonu e manumalo pea lona alofa.

## **MATI 7 – O LE IVA O ASO O LE VAITAU O LE LENI**

Tusi Faitau: Mataio 4:1-11

Matua: Mataio 4:1 - *“Ona aveina ae lea o Iesu i le vao e le Agaga, ina ia faaososoina e le tiapolo.”*

Manatu Autu: **“O IESU TATOU TE MANUMALO AI I FAAOSOOSOGA”**

Tatou Faafetai i le Atua: -

1. Auā o Ia lava le Tupu ma lo tatou Atua o loo afio i lona nofoalii, ua logona mai lo tatou alaga atu, ma vave alu ifo e faaola i tatou.
2. I lona lavea’i mai i mailei ma faaososoga a le fili e fano ai.
3. Ona ua mautinoa e leai se mea o i lenei olaga e mafaia ona faate’aseina mai i tatou i le alofa tunoa o le Atua e ala ia Iesu Keriso.

Tatou Faatoese i le Atua: -

1. Ona ua avea lo tatou vaivai i mea o le tino ma ala ua malo ai le tiapolo ia i tatou.
2. Ona ua vaivai le Ekalesia i ona tiute o le leoleo e ala i le tatalo ma mataala i le oo mai o faaososoga.
3. Ona ua vālea i tatou; o mea e ao ona tatou faia, ua le faia, a ua faia mea e le tatau ona fai.

Tatou Tatalo i le Atua: -

1. Ina ia foai mai le malosi o i tatou tino, agaga, ma mafaufau ua gase i tiute feagai ai i aso taitasi e ala i lona Agaga.
2. Ia galue mai pea lona Agaga i o tatou loto ma faatonu mai i o tatou ala ina ia atoatoa lo tatou faatuatua.
3. Ia oo mai lava lana pule ma lona filemu e pulea ma le tonu le lalolagi fevaevae’i ma le malaia.

## **MATI 14 – O LE SEFULU LIMA O ASO O LE VAITAU O LE LENI**

Tusi Faitau: Salamo 121

Matua: Salamo 121:4 – *“Faauta, o lē leoleo ia Isaraelu, e le tulemoe ia, e le moe lava.”*

Manatu Autu: **“O LE LEOLEO E LE TULEMOE, E LE MOE LAVA”**

Tatou Faafetai i le Atua: -

1. I lona leoleo mai pea ia i tatou i aso uma ua saogalemu ai i tatou.
2. Ona o le faavavau o lona alofa ia i tatou, ma lona faamaoni e au tupulaga lea.
3. Ona o le pale o le olioli ua teuina ma faapaleina ai i latou uma o e tutumau ma faamaoni i le talalelei a Iesu Keriso.

Tatou Faatoese i le Atua: -

1. Ona ua pogisa i tatou i le leaga o le agasala ma lona tau, ona ua masani lava tatou i ai.
2. Ona ua faigofie ma gata ai i le lalolagi ma lona potu la tatou saili fesoasoani, a ua le muamua faasaga a’e i le Atua.
3. I lo tatou manatu e le o leoleo mai le Atua ma silafia mai i tatou.



Tatou Tatalo i le Atua: -

1. Ina ia talitonu pea i tatou i lona leoleo mai e ui i lo tatou feagai ai ma faafitauli o le soifuaga.
2. Ia faatupuina pea lo tatou faatuatua e vaavaai a'e ai mata faaleagaga i le Atua lo tatou fesoasoani.
3. Ina ia faaauppegaina pea i tatou uma taitoatasi e fai ma leoleo i o tatou aiga, nuu ma ekalesia.

**MATI 21 – O LE LUA SEFULU TASI O ASO O LE VAITAU O LE LENI**

Tus Faitau: Roma 5:1-11

Matua: Roma 5:8 – *“A ua fa’aalitinoina mai e le Atua lona lava alofa ia te i tatou, ina ua maluu Keriso ma sui o i tatou, a o tatou agasala pea.”*

Manatu Autu: **“O LE LELEIGA UA FAIA E ALA IA KERISO”**

Tatou Faafetai i le Atua: -

1. Ona e ui lava i o tatou faaletonu e tele, a ua fou mai pea ana faamanuiaga mo i tatou i aso taitasi.
2. Ina ua le avefa o tatou faaletonu ma pa e punitia ai lona aapa mai ma faaola mai.
3. Ina ua le taofia lava lona Alo pele e toatasi, a ua afio mai e fai le leleiga mo i tatou ma le Atua.

Tatou Faatoese i le Atua: -

1. Ona o lo tatou faia o mea ua le tusa ma le finagalo o le Atua, ua leaga ai pea lo tatou va ma le Atua.
2. Ona o i tatou lava o le fotu o le agamasesei, ma ua toilalo pea i faaosoosoga a le tiapolo.
3. Ona o i tatou lava o se fanau faamaualuga i le Atua lo tatou Tama Faalelagi.

Tatou Tatalo i le Atua: -

1. Ia ‘aua lava ne’i aveesea lona Agaga i luga ia i tatou, ina ia tatou lagona ai pea lona mafanafana ma lona faatasi mai.
2. Ia faaaogaina pea lana Ekalesia mo galuega o le leleiga i le lalolagi fevaevae’i.
3. Ia iloa e lana Ekalesia ona muamua faalelei o ia ma le Atua, ona moni ai lea o lona valaauina i le galuega o le leleiga.

**MATI 28 – O LE LUA SEFULU FITU O ASO O LE VAITAU O LE LENI**

Tusi Faitau: I Samuēlu 16:1-13

Matua: I Samuēlu 16:7 – *“A ua fetalai mai le Alii ia Samuēlu, ‘Aua e te vaai i lona tino, po o le maualuga o lona tino, auā ua ou tetee ia te ia; auā e le vaai le Alii pei o le vaai o tagata, auā e vaai tagata i le tino, a e vaai le Alii i le loto.”*

Manatu Autu: **“E SILASILA LE ALII I TOTONU, A E LE O FAFO”**

Tatou Faafetai i le Atua: -

1. I lona a’oa’o mai pea ia i tatou le eseesea o le mea moni ma le mea faatauvaa.
2. Ina ua avea lava le loto o le tagata ma malumalu e afio ai ma valaauina ai le tagata e tusa ma lona silafia.
3. I lona faaaogaina o i tatou uma ma lona filifilia faapitoa o nisi mo ana fe’au i le lalolagi.

Tatou Faatoese i le Atua: -

1. Ona ua fua agavaa o tagata mo galuega i le vaai i fafo ae le o totonu.
2. Ona o lo tatou tausisi atu pea i mea ua masani ai, ae le talia faaaliga fou a le Agaga.
3. Ona o le galo ia i tatou ona ofoina pea le faafetai e le aunoa i le Alii mo lona faamagaloina mai o i tatou.

Tatou Tatalo i le Atua: -

1. Ia fesoasoani mai ia fai aso uma ma aso e ofoina mo Ia; amata i le asō.
2. Ia avea lava o tatou tagata ma ala o ana faamanuiaga mo nisi e toatele.
3. Ia faatumauina pea le alofa i o tatou loto, ina ia viia o Ia i mea uma tatou te faia.

#### **APERILA 4 – O LE TOLU SEFULU TOLU ASO O LE LENI**

Tusi Faitau: Esekielu 37:1-14

Matua: Esekielu 37:5 – *“Ua faapea ona fetalai mai o le Alii le Atua i na ivi, ‘Faauta, ou te faaulu ane le mānava i totonu ia te outou, ona outou ola ai lea.’”*

Manatu Autu: **“O LE MĀNAVA OLA MO IVI MAMAGO”**

Tatou Faafetai i le Atua: -

1. Ona o lona silafia pea o i tatou ma o tatou mana’o. Ua le gata i lona faafogaina mai o tatou talotaloga, a ua ia tali mai lava i o tatou mana’oga uma.
2. I lona mana o loo galue i totonu ia i tatou e tupu ai mea lelei. I lona agalelei ma ana faamanuiaga mo i tatou.
3. I le tele o lona alofa ma lona tausii mai. Aemaise lava le taulaga ua faia e Keriso ua tatou saoloto ma maua ai le ola.

Tatou Faatoese i le Atua: -

1. I lo tatou faia pea o le agasala ua mago ai lo tatou ola faaleagaga ma leai ai se faamoemoe i o tatou tagata.
2. I lo tatou manatu i lo tatou malosii ma le iloa e mafai ona tumau ai le ola ia i tatou.
3. I le masalosalo pea o tatou loto i le Atua ma lona mana e toe ola ma malolosi ai o tatou ivi mamago.

Tatou Tatalo i le Atua: -

1. Ia galue mai pea lona Agaga e tali lo tatou galala ma le matelaina faaleagaga.

2. Ia galue pea ma le lototele le Ekalesia e tusa ma lana galuega faaola i ivi mamago ua tumu ai le lalolagi.
3. Ia iloa e le lalolagi o loo soifua Oe Keriso i au galuega mamana ma galuega faaola o molimauina i le ola o tagata e toatele.

### **APERILA 11 – VAIASO O PUAPUAGA, MA LE MALIU O LE ALII**

Tusi Faitau: Filipi 2:5-11

Matua: Filipi 2:8 – *“A o iloa o ia i ona foliga e faapea o se tagata, ua faamaulalo o ia e ia lava, ua na anaana ua oo ina maliu, o le maliu lava lea i le satauro.”*

Manatu Autu: **“O LE ATUA UA SAU I LALO E FAAOLA OE MA A’U”**

Tatou Faafetai i le Atua: -

1. Ona o lenei Vaiaso Pa’ia e taula’i ai le vaai a le au Kerisiano i le Alii ma lona soifua ofoina mai atoatoa mo le lalolagi.
2. I le Keriso tuulafoa’iina, i lona tau’aveina o tatou tiga ma o tatou faanoanoa. O ona faalavalava ua malolo ai tatou.
3. I le moni o folafolaga a le Alii i le alofa o le Atua i le lalolagi, ua auina mai ai lona atalii e toatasi ina ia le fano se tasi e faatuatua ia te ia, a ia maua le ola faavavau.

Tatou Faatoese i le Atua: -

1. Ona o le faigata ona lagona e le tagata le mauuluga, le loloto, ma le lautele o le alofa o le Atua ua ala mai ia Keriso Iesu.
2. I lo tatou le usita’i i le finagalo o lo tatou Tama ua maliu ai Keriso ma sui o i tatou.
3. I ala ua tatou faalataina ai pea lo tatou Alii o Iesu.

Tatou Tatalo i le Atua: -

1. Ia maua e lana Ekalesia ma le au Faatuatua uma lava lea manatu sa ia Keriso Iesu, o le lotomaulalo ma le usita’i i le Tama.
2. Ia lototele pea le Ekalesia ma i tatou uma e fa’aaaoa i le soifua o Keriso: o le Ola Ofoina Atu mo le Atua ma tagata.
3. Ia maua pea e le Ekalesia le loto salamō ma le faatuatua i le Alii, le Matai o le Galuega.

### **APERILA 18 – VAIASO SA MUAMUA O LE VAITAU O LE ESETA**

Tusi Faitau: Salamo 118:14-24

Matua: Salamo 118:14-15 – *“O le Alii, o lo’u malosi o ia ma la’u pese, ua avea foi o ia mo’u faaolataga. O leo o le alaga fiafia ma le olataga, o i ai ia i fale ie o e amiotonu.”*

Manatu Autu: **“UA OO MAI LE FAAOLATAGA I LOU FALE I LE ASO NEI”**

Tatou Faafetai i le Atua: -

1. Ona o le Toe Tu o Keriso ua fai ma aso e olioli ma fiafia ai le au Kerisiano ina ua maua le lototele e molimau ai i le mana o le Atua.

2. Ona o le mana o le Toe Tu, ua mautinoa ai o lo tatou Atua, o le Atua o le Ola ma le Ola e le uma.
3. Ona o le Toe Tu o Keriso, ua fai ma faavae o pese fou a le au Faatuatua.

Tatou Faatoese i le Atua: -

1. Ona o le vave mou atu o le tāua o le Toe Tu i o tatou manatu, ae suia i nisi mea o saili ai o tatou tagata e fiafia i ai.
2. Ona ua fesiligia le moni o le Toe Tu e le atamai o tagata i nei ona po.
3. Ina ua le iloa e le Ekalesia ma o tatou tagata ona ola i le soifua Toe Tu e pei ona faailoa mai e Keriso.

Tatou Tatalo i le Atua: -

1. Ia maua e o tatou tagata le lototele e molimau ai pea i le moni o le Toe Tu o le Alii mai le tuugamau.
2. Ina ia talitonu lava i tatou i le vavega sili lea ua faia e le Atua, e ui e le'i vā'ai i ai o tatou mata.
3. Ia fesoasoani mai lona Agaga ia le na o lenei vaiaso, a o aso uma tatou te a'oa'o ai i o tatou aiga le uiga o le Toe Tu mai o Keriso mai le oti.

## **APERILA 25 – VAIASO SA LONA LUA O LE VAITAU O LE ESETA**

Tusi Faitau: 1 Peteru 1:3-9

Matua: 1 Peteru 1:4 – *“Ia i'u i le tofi e le pala, e leai se leaga o i ai, e le mamae lava, o loo teu i le lagi mo outou.”*

Manatu Autu: **“O LE TOFI E LE PALA, E LEAI SE LEAGA, E LE MAMA E LAVA”**

Tatou Faafetai i le Atua: -

1. Ona o le tofi ua folafolaina mai mo i tatou e ala i le toe tu o Keriso.
2. Ona o le toe tu manumalo o Keriso mai le oti, ua avea lea ma manumalo o le au faatuatua.
3. Ua manutinoa ai lava le leai o se malosi i le luga, atoa ma lalo nei e faate'aeseina mai i tatou i le alofa o le Atua e ala ia Keriso Iesu.

Tatou Faatoese i le Atua: -

1. Ona o loo avea pea le oti i le tino ma mea e mata'u ma fefe ai le tagata.
2. Ona ua le tausinio i tatou i le tofi ua folafolaina mai ua teuina mo i tatou i le lagi.
3. Ona ua tatou manatu i 'oa o le olaga nei e pala, e le tumau, e gaioia e tagata.

Tatou Tatalo i le Atua; -

1. Ia fesoasoani mai lona Agaga ina ia faasili pea i o tatou loto le suafa manumalo o Keriso, lo tatou Faaola.
2. Ia fa'aalia i o tatou ola le olioli i le faolataga ua Ia faia e ala mai ia Iesu Keriso, lo tatou Alii.
3. Ia galue mai pea le mana o le Keriso Toe Tu i o tatou tagata e maua ai auupega e liliu ai le lalolagi oti i le lalolagi ola mo Keriso.

## **ME 2 – VAIASO SA LONA TOLU O LE VAITAU O LE ESETA**

Tusi Faitau: Luka 24:13-35

Matua: Luka 24:32 – *“E lei mu ea o ta loto i totonu ia i taua, ina ua fetalai o ia iā te i taua i le ala, ina ua faamatala mai foi e ia o Tusi ia te i taua?”*

Manatu Autu: **“O IESU KERISO UA TAUNUU AI TUSI”**

Tatou Faafetai i le Atua: -

1. I lana Afioga o loo faailoa manino mai ai le tala o le faaolataga, aemaise o lona taunuuga ia Iesu Keriso.
2. I lona Agaga o loo a’oa’o mai ia i tatou le uiga o lana Afioga.
3. I lona faapupulaina o tatou mata faaleagaga i le matagofie o le tala ia Iesu le faaola o le lalolagi.

Tatou Faatoese i le Atua: -

1. Ona o lo tatou le ma’elegā e faitau ma su’esu’e i lana afioga.
2. Ina ua na ona tatou faitau i le Tusi Paia, ae le lagona ma usita’i i ai.
3. Ona ua tatou tuu le upu a le Atua, ae folafola atu i tagata a tatou upu.

Tatou Tatalo i le Atua: -

1. Ia paia pea lana afioga i o tatou loto ma agaga e faavae ai lo tatou ola auauna i lona finagalo.
2. Ia maua e i tatou le augofie e faitau ma suesue le Afioga a le Atua.
3. Ia fesoasoani lona Agaga ina ia faailoa atu pea e i tatou le upu alofa a le Atua, ae le o upu e fasioti ai agaga o tagata.

## **ME 9 – VAIASO SA LONA FA O LE VAITAU O LE ESETA, A O LUMANAI LE ASO SA O TINA**

Tusi Faitau: Galuega 2:42-47

Matua: Galuega 2:47 – *“Ua faaopoopoina i le ekalesia e le Alii i aso fai soo o e ua faaolaina.”*

Manatu Autu: **“UA TUPU MA OLA LE TALA IA IESU LE FAAOLA”**

Tatou Faafetai i le Atua: -

1. Ona e le o tu’u le tala’i, a o loo valaau pea ina ia lagona e tagata uma le tala o le faaolataga ia Iesu Keriso.
2. Ona o le tala ia Iesu ua valaauina i ai tagata uma; tama, tina, e oo lava i fanau, e galulu ai mo Keriso.
3. Ona o le Keriso manumalo o loo mafuta mai pea ia i tatou, auā e le mafaia e i tatou ona fai o se mea pe a le auai mai o ia.

Tatou Faatoese i le Atua: -

1. Ona o tatou uiga ma amio ua le tupu ma ola ai le tala ia Iesu i le vaai mai o nisi ia i tatou.
2. Ona o tatou le fanau i lo tatou le ava ma usita’i i o tatou tina na fanau i tatou i lenei lalolagi.
3. Ona o lo tatou le faamaoni i o tatou tiute ma lo tatou valaauina, a o i tatou ua valaauina e le Alii e faailoa le tala ia Iesu.

Tatou Tatalo i le Atua: -

1. Ia faamanuia i tina uma o le atunuu, ekalesia, ma aiga. Ia tumau ia i latou le alofa o Keriso, le Faaola.
2. Ia avea i tatou uma ma e tupu ma faaopoopoina ai le numerā o e ua faaolaina i le ekalesia a le Alii.
3. Ia tupu ma ola le Malo o le Atua ma le tala ia Iesu le Faaola i loto o tagata e toatele.

## **ME 16 – VAIASO SA LONA LIMA O LE VAITAU O LE ESETA**

Tusi Faitau: 1 Peteru 2:1-10

Matua: 1 Peteru 2:9 – *“A o outou o le tupulaga ua filifilia outou, o tupu ma ositaulaga, o le nuu paia, ma le nuu na faatauina mai e le Atua ina ia outou ta’uta’u atu ana galuega lelei.”*

Manatu Autu: **“O LE EKALEZIA UA FAI MA NUU FOU O LE ATUA”**

Tatou Faafetai i le Atua: -

1. Ona ua avea lava i tatou, le Ekalesia, ma nuu fou o le Atua e faailoa lona finagalo i le lalolagi.
2. I lona filifilia o i tatou, o e sa le alofaina, a ua alofaina lava, mo galuega o lona Malo.
3. I le galuega faaola a Keriso, ua avea ai i tatou ma nuu fou o le Atua.

Tatou Faatoese i le Atua: -

1. Ona ua le tusa lona alofa mai ma lona filifilia o i tatou e fai mona nuu fou, ma lo tatou tali atu i lona agalelei.
2. Ona ua tatou le savavali i ona ala, ma lē faia e tusa ma lona finagalo.
3. Ona ua fultua lava i tatou i le Alii ma lona agalelei, ae faasaga atu i le lalolagi ma ona tuinanau.

Tatou Tatalo i le Atua: -

1. Ia galue mai lona Agaga ia i tatou ina ia tatou lagona lo tatou filifilia e le Atua e fai mona nuu fou.
2. Ia mitamita i tatou, o lana Ekalesia, i le faaaogaina o i tatou e le Atua mo lona finagalo.
3. Ia tatou maua le lototele, aemaise o le olioli, ina ua faatauina i tatou e le Atua, ma avea ai mona nuu e faavavau.

## **ME 23 – VAIASO SA O LE AFIO A’E O IESU I LE LAGI**

Tusi Faitau: Ioane 14:15-21

Matua: Ioane 14:19 – *“E toe itiiti ona le vaai mai lea o le lalolagi ia te au, a e vaai mai pea outou ia te au; oute ola a’u, o le mea lea e ola ai foi outou.”*

Manatu Autu: **“LE KERISO E VAAI PEA I AI LE AU FAATUATUA”**

Tatou Faafetai i le Atua: -

1. I le Keriso Toe Tu ua le o toe saisaitia i le tino, a ua vaaia ma iloa o ia e le au faatuatua i soo se taimi ma soo se mea.

2. I le mafanafana o ana folafolaga mo i tatou, e ui ina tuua i tatou i le tino, a o loo faatasi mai pea ia i tatou e ala i le agaga.
3. I lona afio a'e i le lagi ma faaaauu pea le galuega alofa o le molimau ma fautua i le Tama mo i tatou.

Tatou Faatoese i le Atua: -

1. Ona o lo tatou masalosalo ua tuulafoa'iina i tatou e lo tatou Matai pe a tutupu faigata i lo tatou ola.
2. Ona o meaalofa ua foai mai mo i tatou a ua tatou le faaaoga tatau e auuuna ai i le Atua ma le tuaoi.
3. Ona o lo tatou taumafai e ufiufi mea sese ua tatou fai, a o le Atua e silafia mea uma.

Tatou Tatalo i le Atua: -

1. Ia fesoasoani mai ina ia tatou iloa ona faatino le alofa i nisi e pei ona alofaina mai i tatou.
2. Ia avea i tatou ma molimau faamaoni i lona alofa, e pei ona ia molimauina i tatou i le Tama.
3. Ia maua e i tatou le loto faatalitali ma le onosa'i i le Fesoasoani sili ua ia folafolaina mai a o le'i afio i le lagi.

### **ME 30 – A O LUMANA'I LE ASO SA PENETEKOSO**

Tusi Faitau: Ioane 20:19-23

Matua: Ioane 20:22 – *“Ua ia fetalai atu lea mea, ona mānava atu lea o ia iā te i latou ma faapea atu, “Ia outou talia le Agaga Paia.”*

Manatu autu: **“IA TATOU TALIA LE AGAGA PAIA”**

Tatou Faafetai i le Atua: -

1. I le auina mai o le Agaga Paia e fesoasoani, faamalosi, ma taitai lo tatou ola a o i ai i lenei lalolagi.
2. Ona o le Agaga Paia ua fua mai i lo tatou ola le alofa, le olioli, le filemu, le onosai, le mataalofa, le agalelei, le faamaoni, le agamalū, ma le amio mamā.
3. I le mana o le Agaga Paia na faatuina ai Keriso mai le oti, o le mana lava lea o loo galue ia i tatou ina ia faia lona finagalo.

Tatou Faatoese i le Atua: -

1. Ina ua lē faatuatua ma lē tapua'i i tatou i le Atua i le agaga ma le faamaoni.
2. Ona o le tele o taimi ua tatou faaonoono i le Agaga Paia e ala i le faia o tatou loto, ae le usitai i lona musumusu mai.
3. Ina ua le maua le agaga o le loto maulalo ma tatou manatu ua sili nisi ia i tatou.

Tatou Tatalo i le Atua: -

1. Ina ia le aveesea i o tatou luga, ma luga o lana Ekalesia lona Agaga Paia, a ia nofo mau i totonu ia i tatou.

2. Ia faauuina ma faagagaina e le Agaga Paia le Ekalesia ma o tatou tagata galulue ina ia molimau pea i le talalelei a Iesu Keriso.
3. Ina ia faamalosia o tatou loto usitai, faatupu lo tatou faatuatua, ma faamausali lo tatou faamoemoe i le Atua ma lona finagalo.

## **IUNI 6 – A O LUMANAI LE ASO SA O LE TOLU TASI PAIA**

Tus Faitau: 2 Korinito 13:11-14

Matua: 2 Korinito 13:14 – *“Ia iā te outou uma lava le alofa tunoa o le Alii o Iesu Keriso, ma le alofa o le Atua, atoa ma le mafuta faatasi ma le Agaga Paia.”*

Manatu Autu: **“LE ATUA LE TAMĀ, LE ALO, MA LE AGAGA PA’IA”**

Tatou Faafetai i le Atua: -

1. Ona o faaaliga o le alofa tunoa i ona peresona: le Atua le Tama, o Le na tatou tupu ai, le Atua le Alo, o Le na togiola mai, ma le Atua le Agaga Paia, o Le e mafuta mai ma tonu ai mea tatou te faia.
2. Ona e ui e tolu suafa po o peresona ua iloa ai e le au faatuatua lau afio, a o lau afio lava o le Atua e toatasi, mai le vavau e oo i le faavavau. O Le na faia i matou i lou lava faatusa paia.
3. Ona o Iesu Keriso ua iloa atoatoa ai e le lalolagi ma ou tagata faatuatua lau afio, aua ua faaaliga atoatoa ai le mutimutivale o lou alofa.

Tatou Faatoese i le Atua: -

1. Ona ua le tatalaina faitotoa o tatou loto ma faaulufale Keriso e pule i o tatou loto ma o tatou ola.
2. Ona o lo tatou faatiga i lona finagalo ina ua le saili atu i le alofa ma faia le amiotonu.
3. Ona o le maa’a o tatou loto ina ua tatou vaaia vavega ma lou alofa, ae masalosalo i tatou ma manatu e le mai lau afio lea.

Tatou Tatalo i le Atua: -

1. A’oa’o mai ina ia tatou maua le manatu sa ia Keriso Iesu, o le loto maulalo ma le anaana i le Tama.
2. Ia atagia i lo matou ola le fealofani ma le feavata’i e pei ona vaaia ma mautinoa i lau afio le Atua Tolu Tasi.
3. Ia faapa’iaina pea le Ekalesia ma i matou uma e faailoa ou vavega ma molimau i lou alofa i le lalolagi.

## **IUNI 13 – VAIASO SA LONA LUA TALU LE PENETEKOSO**

Tusi Faitau: Kenese 21:1-9

Matua: Kenese 21:6 – *“Ua faa’ata’ataina a’u e le Atua, o i latou uma o e faalogo mai latou te taufaiata faatasi ma a’u.”*

Manatu Autu: **“E FAA’ATAINA I TATOUE LE ATUA”**

Tatou Faafetai i le Atua: -

1. Ona o mea e tele faafiafiaina ai i tatou e le Atua i aso uma.



2. Ona o le moni ma le faamaoni o ana folafolaga.
3. Ona o mea e faigata i le manatu o le tagata, a e le faigata i le Atua.

Tatou Faatoese i le Atua: -

1. E galo pea ia i tatou o loo silafia e le Atua mea uma, ma o loo i ona aao le faataunuaina o lona finagalo.
2. Ona ua tatou manatu ua pei le Atua o le tagata, e le mafaia mea faigata o le olaga.
3. Ona faato'a talitonu o tatou tagata ina ua vaai i ai, ae le faatuatua i le mana o le Atua.

Tatou Tatalo i le Atua: -

1. Ia a'oa'o mai le Agaga ina ia tatou iloa o tatou manatu e le o manatu ia o le Atua.
2. Ia fa'auupegaina pea o tatou tagata i lona finagalo ina ia tupu pea lo tatou talitonu i le Atua ma lona silisili ese.
3. Ia tatou fiafia i le Atua i taimi ma aso uma, aua o Ia o loo fiafia mai ia i tatou.

## **IUNI 20 – A O LUMANA'I LE ASO SA O TAMĀ**

Tusi Faitau: Salamo 72

Matua: Salamo 72:3 – *“E fua mai mauga le manuia mo le nuu, ma mauga iti e fua mai i le amiotonu.”*

Manatu Autu: **“E FAAINU E LE MAUGA LE VANU, E FAAPENA LE TAMĀ I LONA AIGA MA LONA NUU”**

Tatou Faafetai i le Atua: -

1. Ona o Tamā ua e tofia e fai ma ulu o aiga e taitai ma alofa i a latou fanau, e pei o oe le Atua i lau fanau uma i le lalolagi.
2. I au meaalofa i Tamā o le tofa ma le fa'autaga ua ala mai ai au faamanuiaga mo aiga, nuu, atunuu ma le Ekalesia.
3. I le faaaliga o lau amiotonu i Tamā uma, ua fai ma faaaoao mo i latou, ma fua mai ai i a latou fanau.

Tatou Faatoese i le Atua: -

1. Ona ua vaivai Tamā i lo latou tiute o le faatonu ma a'oa'o fanau ia savavali ma le usita'i i lou finagalo.
2. Ona ua faauiga sese le aveva o Tamā ma ulu o le aiga, ma ala ua pule sauva ai i aiga ma fanau.
3. Ona ua faatau le tofa ma le faautaga i tamaoiga ma upu faasee, ma toilalo ai le tagata lilo i faaososoga a le fili.

Tatou Tatalo i le Atua: -

1. Ina ia faamanuia ma tausia e le Atua Tama uma o aiga, le atunuu, ma Ekalesia.
2. Ina ia moni upu a le Fai Salamo i o matou Tama, “E fua mai mauga le manuia mo le nuu, ma mauga iti e fua mai i le amiotonu.”
3. Ina ia ala mai i Tama uma au faamanuiaga mo aiga ma fanau, ma lau amiotonu ia atagia ia i latou.

## IUNI 27 – VAIASO SA LONA FA TALU LE PENETEKOSO

Tusi Faitau: Kenese 22:1-17

Matua: Kenese 22:14 – *“Ona faaigoa ai lea e Aperaamo o lea mea O le Alii na te aumaia; e pei ona fai mai ai i nei ona po, E iloa le Alii i le mauga.”*

Manatu Autu: **“O LE ALII NA TE AUMAI!”**

Tatou Faafetai i l Atua:

1. I lona saunia ma aumaia mo i tatou o mea lelei uma.
2. I lona a’oa’o mai pea ia i tatou ina ia faatuatua ia te Ia e pei ona faia e Aperaamo.
3. I lona le taofia o lona alo e toatasi, a ua ofoina mai e fai ma sui o i tatou.

Tatou Faatoese i le Atua: -

1. Ona ua tatou mumusu e ofo i le Atua mea e pele i o tatou loto pe a finagalo mai i ai le Alii.
2. Ona ua galo pea ia i tatou, o le Atua e ona mea uma aua o Ia lava na faia mea uma.
3. Ona ua le oo i tatou i le matua o le faatuatua e talitonu ai i le Alii pe a feagai ma faigata o le olaga.

Tatou Tatalo i le Atua: -

1. Ia a’oa’o mai pea lona Agaga ina ia manino ia i tatou o le Atua e ona mea uma, a o i tatou o tausī mea a le Atua.
2. Ia faatupuina pea le faatuatua i o tatou loto e talitonu ai i lona mana.
3. Ia saunia o tatou tagata e ofo atu i le Alii mea uma e finagalo ai.

## IULAI 4 – VAIASO SA LIMA TALU LE PENETEKOSO

Tusi Faitau: Mataio 11:25-30

Matua: Mataio 11:28 – *“Ia outou o mai ia te a’u, o outou uma o e tigaina ma mafatia i avega, o a’u foi e malolo ai outou.”*

Manatu Autu: **“A MAMAFI LE AVEGA O KERISO NA TE TAUAVEINA”**

Tatou Faafetai i le Atua: -

1. Ona e ui ina teena e le lalolagi Keriso, ae na te le’i teena le lalolagi na afio mai e faaola.
2. Ona o lou finagalo e faaalua e mea vaivai ma tama valevale e faamasiasi ai le potu ma le atamai o lalolagi.
3. I le valaau a Keriso i e uma e mafatia ma tigaina i avega, e foi atu i le Alii e malolo ai.

Tatou Faatoese i le Atua: -

1. Ona ua avea nisi o tatou aganuu ma avega mamafa i le tele o tagata.
2. Pe afai ua avea le Tala lelei ma galuega a le Ekalesia ma ala ua pologa ma mafatia ai le toatele.
3. Ina ua faaoga le potu ma le atamai ma auupega e faatumau ai le pule i se vaega toaitiiti ae pologa ma mafatia ai le toatele.

Tatou Tatalo i le Atua: -

1. Ia liligi mai i luga o le Ekalesia le potu mai le lagi e iloa ai faaaoao i le amo a Keriso, aua e avegofie ma māmā.
2. Ia nofo sauni pea le au faatuatua e talepe aganuu ua fai ma avega mamafa i tagata.
3. Ia le mapu ona faailoa e le Ekalesia i tagata le amo a Keriso, o le agamalu ma le loto maulalo.

## IULAI 11 – VAIASO SA ONO TALU LE PENETEKOSO

Tusi Faitau: Roma 8:1-11

Matua: Roma 8:1 O lenei ua leai se faasala i e o ia Keriso Iesu, o e le savavali i la le tino, a e la le Agaga.

Manatu Autu: **“E ILOA LE TAGATA UA TAUAMIOTONUINA I LANA SAVALI”**

Tatou Faafetai i le Atua: -

1. Ona o le saolotoga ua tuuina mai i le tagata ma le musumusuga a le Agaga Paia ina ia filifili i le Ola ae le o le Oti.
2. Ona o le faailoa mai pea i o tatou tagata vaivai le ala e savali ai o loo i ai le manuia.
3. Ona o le galuega faaola i lona alofa tunoa ua leai ai se faasala i e o ia Keriso Iesu.

Tatou Faatoese i le Atua: -

1. Ona e ui ua taunuu le faaolataga, a o tatou o savavali pea i la le tino.
2. Ona ua tatou manatu tatou te mafaia ona tetee atu i le malosi o le agasala, a ua le faamoemoe i le Agaga.
3. Ina ua faigofie ona tatou talia le faia o le agasala ona o le tele na'uā o le alofa tunoa o le Atua.

Tatou Tatalo i le Atua: -

1. Ia galue pea le Agaga Paia i le Ekalesia ina ia savavali ona tagata uma i la le Agaga.
2. Ia lagona e o tatou tagata le tausisi atu pea i le Keriso, le Faaola auā o loo manatu mai pea o Ia iā i tatou.
3. Ia a'oa'o mai pea le Agaga ina ia tatou mautinoa e le fai mo e savavali i la le Agaga le toilalo ma le faasala, a o le faaeaina ma le manumalo.

## IULAI 18 – VAIASO SA FITU TALU LE PENETEKOSO

Tusi Faitau: Mataio 13:24-30

Matua: Mataio 13:28-29 – *“Ona fai mai ai lea o auauna ia te ia, ‘E te finagalo ea matou te o atu e veleeseina ia mea?’ A ua fai atu ia, ‘Aua; ina nei outou liai ma le saito pe a outou vele ese le titania.’”*

Manatu Autu: **“UA OLA A'E FAATASI LE SAITO MA LE TITANIA”**

Tatou Faafetai i le Atua: -

1. Ona o faataoto ma le faamatalaina o latou uiga ua avea ma Afioga a le Atua e a’oa’o, e aoa’i, ma faatonu ai i le Upu o le Ola.
2. Ona ua tatou molimauina le moni o le Afioga a le Atua ina ua vaaia le tutupu faatasi o le lelei ma le leaga i o tatou aiga, aulotu, ma o tatou lava olaga.
3. Ona ua saunia lava e le Atua le aso e tuu eseese ai le saito ma le titania auā o Ia e tonu ana faamasinoga.

Tatou Faatoese i le Atua: -

1. Ona ua le iloa e le Ekalesia lona valaauina; e le o le Faamasino i e amiotonu ma e amioletonu, a o le galue e liliu le “titania” ia avea ma “saito”.
2. Ona o lo tatou naunau vave e aveese le “titania” leaga mai totonu o a tatou mafutaga, ae afaina ai le “saito” lelei o loo pulea e le alofa ma le faamagalo lona loto.
3. Ona ua le manatu e avea foi o tatou loto ma “eleele” e tupu ae ai faatasi manatu lelei ma manatu leaga e afaina ai, a ua faigofie ona tatou faamasino atu.

Tatou Tatalo i le Atua: -

1. Ia a’oa’o mai le Agaga i lana Ekalesia e alo ese mai le faavasegaina o tagata lelei ma tagata leaga, a ia galue ina ia latou iloa le tala o le OLA.
2. Ina ia tatou mumusu e nonofo i le nofoa o e tauemu ma e faamasinosino atu, a ia naunau atu i le tulafono a le Alii o le alofa.
3. Ia faamaoni i o tatou tiute o le faailoa o le tala lelei o le faaolataga i tagata, ma faatuatua i fuafuaga a le Faamasino Amiotonu.

## **IULAI 25 – VAIASO SA VALU TALU LE PENETEKOSO**

Tusi Faitau: 1 Tupu 3:5-12

Matua: 1 Tupu 3:9 – *“O lea ia e foai mai ai i lau auauina le loto matala ina ia faamasino e ia i lou nuu, ma ia masino ai i le lelei ma le leaga, auā po o ai na te mafaia ona faamasino i lou nuu nei ua matua toatele.”*

Manatu Autu: **“LOTO MATALA: AUUPEGA FAU MANUIA MO SE TA’ITA’I”**

Tatou Faafetai i le Atua: -

1. Ona o le tofa ma le faautaga ua foaiina mai i taitai latou te faafoe ai le atunuu, malo, ekalesia aemaise aiga e tusa ma lou finagalo.
2. Ona o avanoa tuuina mai e saili atu ai i lou finagalo e faatonu ma faaatoatoa tiute ma faiva feagai ai.
3. Ona o le Agaga ua fesoasoani e faaupu o tatou lagona i luma o le Atua e atagia ai lo tatou faatuatua, ae le o le mana’o lasi.

Tatou Faatoese i le Atua: -

1. Ina ua tatou soona faatoga atu i le Atua mo le lelei na o i tatou, ae le mo le manuia o le toatele.

2. Ina ua tatou le maua le loto matala e masino ai le lelei ma le leaga ma tatou faia ai faaiuga tonu e finagalo ai le Atua.
3. Pe afai ua le iloa e le Ekalesia ma o tatou tagata o tatou ua sese.

Tatou Tatalo i le Atua: -

1. Ia foai mai i taitai o le Ekalesia le loto matala e faia ai ma le tonu galuega uma e tusa ma le finagalo o le Matai.
2. Ia maua le agaga o le galulue faatasi o itu tino uma o le tino o Keriso, le Ekalesia, ina ia viia ai le Ao o le Ekalesia.
3. Ia a'oa'o mai o tatou tagata ina ia faatoga ma le potu i le Atua ina ia maua auupega fau manuia mo le galuega.

## **AOKUSO 1 – VAIASO SA IVA TALU LE PENETEKOSO**

Tusi Faitau: Auega 3:21-26

Matua: Auega 3:22-23 – *“O le alofa o le Alii ua le faaumatia ai i tatou, ona ua le mavae o lona alofa mutimutivale; e fou mai ia i taeao uma.”*

Manatu Autu: **“O LE ALOFA OLE ATUA E FOU AI LOU TAGATA I ASO UMA”**

Tatou Faafetai i le Atua: -

1. Ona o lona alofa e fou i taeao ma aso uma o lo tatou ola.
2. Ona o lona alofa e fou ai lagona ma manatu o tatou tagata auā lo tatou ola galulue.
3. Ona o le fou o lona alofa ua mafai ai ona faia e o tatou tagata faaiuga lelei i mea e tutupu i le olaga.

Tatou Faatoese i le Atua: -

1. Ina ua le manatua e le tagata na ia faia lona alofa e maua ai lagona ma manatu fou mo le ola o le tagata.
2. Ina ua faamuamua e le tagata ia lava, a ua le faamuamua le Atua ma lona alofa o loo tausia pea le tagata.
3. Ina ua le ola ai ma faatinoina e le tagata le alofa o le Atua o loo i ai pea ia te ia i aso uma.

Tatou Tatalo i le Atua: -

1. Ina ia tatou lagona pea le fou o le alofa o le Atua mo i tatou i aso uma.
2. Ina ia iā i tatou pea le Atua e ala i lona alofa tunoa e manuia ai mea uma tatou te faia.
3. Ina ia tatou taliaina le fou o le alofa o le Atua i aso uma, ina ia fou ma lelei ai mea uma tatou te faia.

## **AOKUSO 8 – VAIASO SA SEFULU TALU LE PENETEKOSO**

Tusi Faitau: Mataio 14:13-21

Matua: Mataio 14:17 – *“Ona latou fai mai lea ia te ia, e leai ni a tatou mea iinei, ua na o areto e limagafua ma i'a e lua lau.”*

Manatu Autu: **“E TUA MAI LE ALII IA I TATOU I LANA GALUEGA”**

Tatou Faafetai i le Atua: -

1. Ona o loo tatou maua pea avanoa lelei e galulue ai i lana galuega.
2. Ona o Ia o lo tatou faamoemoega e manuia ai lo tatou ola galulue i lana galuega.
3. Ona o le tamaoaiga ma le manuia ua ia foaiina mai, ua tatou tua i ai i le atiina a'e o lana galuega.

Tatou Faatoese i le Atua:

1. Ina ua ia faamoemoe mai i o tatou tagata i le galuega, ae ua tatou le lagonaina ma tali atu ia te ia.
2. Ona ua tatou faatuatua'ia i lana galuega ina ua tatou maua le tele o le tamaoaiga.
3. Ina ua tatou faamuamua o tatou lava tagata, ae le o le Atua.

Tatou Tatalo i le Atua: -

1. Ia tatou lagona taitoatasi, ua valaauina i tatou mo lana galuega.
2. Ia tatou faamalolosi e tautua ma galulue i lana galuega.
3. Ia tatou maua lona tamaoaiga ma le manuia tatou te tua i ai i lana galuega.

## **AOKUSO 15 – VAIASO SA SEFULU TASI TALU LE PENETEKOSO**

Tusi Faitau: Mataio 15:21-28

Matua: Mataio 15:27 – *“Ona fai mai ai lea o ia, ‘Le Alii e, e moni a oe, a e ui i lea ua aai e uli o momoi mea ua pauu i laulau a o latou taula.’”*

Manatu Autu: **“E TALII LE ATUA I E SAILI MA LE FAAMAONI IA TE IA”**

Tatou Faafetai i le Atua: -

1. I le faamaoni o lona alofa mo i tatou i aso uma.
2. I lana tausiga le mavae mo i tatou o le palealii o ana galuega.
3. I le mafuta mai pea o lona Agaga Paia e fesoasoani i lo tatou vaivai.

Tatou Faatoese i le Atua: -

1. Ina ua tatou le galulue ma le faamaoni i lana galuega.
2. Ina ua tatou le faamaoni i o tatou tofi ma tiute ua valaauina ai i tatou.
3. Ina ua tatou le saili ma o tatou loto ma agaga i le Atua, ina ua tatou maua le manuia o lenei lalolagi.

Tatou Tatalo i le Atua: -

1. Ia tatou faamaoni i lo tatou ola galulue i lana galuega i aso uma lava, auā o le manuia lea o lo tatou soifua auaua i le Atua.
2. Ia tatou saili moni i le Atua ma o tatou loto ma agaga, auā o Ia tatou te maua ai le tali mea uma.
3. Ia tumau pea lo tatou talitonu ma faatuatua i le Atua e manuia ai mea uma tatou te faia.

## **AOKUSO 22 – VAIASO SA SEFULU LUA TALU LE PENETEKOSO**

Tusi Faitau: Salamo 18:1-3

Matua: Salamo 18:1 – *“Le Alii e, lo’u malosi, ou te alofa lava ia te ia.”*

Manatu Autu: **“IA FAAMUAMUA LE ATUA I MEA UMA”**

Tatou Faafetai i le Atua: -

1. Ona o Iesu Keriso lona Alo Pele e toatasi, o Le na aumaia le Ola i o tatou tagata ua tatou ola fiafia ma olioli ai.
2. I le tele o lona alofa ia i tatou i aso uma, ua tatou maua ai le manuia ma le tamaoaiga o lenei olaga.
3. Ona o lona malosi lea ua tatou malolosi ai e galulue pea i lana galuega.

Tatou Faatoese i le Atua: -

1. Ona ua tatou le faamuamua le Atua, o Le e ona le malosi uma lava, tatou malolosi ai i aso uma.
2. Ona ua tatou faamuamua le lalolagi ma mea o loo i ai, ae faagalo le Atua tatou te manuia ai.
3. Ona ua tatou le manatua le Atua o le pogai o le tamaoaiga ma le manuia, ina ua tatou manatu o i tatou lava na mafua ai le manuia ua tatou maua.

Tatou Tatalo i le Atua: -

1. Ia faamuamua pea le Atua i aso uma aua o Ia lava tatou te manuia ai.
2. Ia avea pea le Atua e fai ma ta’imuaga o lo tatou ola galulue, ma ia tatou faamoemoe pea ia te Ia i aso uma.
3. O a mea uma tatou te faia i lenei olaga, ae maise lo tatou soifua auauna ma faatuatua ia te ia, ia taulai mea uma i lo tatou Atua tatou te manuia ai.

## **AOKUSO 29 – VAIASO SA SEFULU TOLU TALU LE PENETEKOSO**

Tusi Faitau: Luka 5:17-20

Matua: Luka 5:19 – *“Ona o a’e lea o i latou i luga o le fale, ua tuutuu ifo ia te ia ma lona moega i maa omea o le fale i totonu i luma o Iesu.”*

Manatu Autu: **“O LE TAŪA O LE GALULUE FAATASI”**

Tatou Faafetai i le Atua: -

1. I lona faailoa ma faamanatu mai pea e ala i lona Agaga Paia le taua ma le moni o le ola galulue faatasi.
2. Ona o lana afioga paia o loo faamanatu ma faaali ma pea i o tatou tagata galulue le manuia o le ola galulue faatasi o tagata o le Atua.
3. Ona o Iesu Keriso i lona soifua faatino e ala i galuega na ia faia, o loo faailoa mai ai le taua o le ola galulue faatasi.

Tatou Faatoese i le Atua: -

1. Ona ua tatou faatuatua’i le finagalo o le Atua o loo aumaia ai le taua o le ola galulue faatasi o tagata o le Atua.
2. Ona ua tatou le maua le ola galulue faatasi, ona o tatou manatu ma lagona faamaualuluga ia i tatou lava.
3. Ona ua tatou faamuamua pea o tatou tagata i mea uma, ae ua faagalo lo tatou Atua e maua ai le ola galulue faatasi o tagata uma.

Tatou Tatalo i le Atua: -

1. Ia tatou faamoemoe pea i le Atua o ia lava o loo i ai le taua o le ola galulue faatasi o tagata uma.
2. Ia tatou tofū lagona le taua ma le moni o le ola galulue faatasi o tatou tagata i le galuega a le Atua.
3. Ia aveese mai o tatou tagata galulue le felotoa'i ma le feaina'i, a ia tatou faia le finagalo o le Atua tatou te maua ai le taua o le ola galulue faatasi o tatou tagata faatuatua ma talitonu i le Atua.

## **SETEMA 5 – A O LUMANA'I LE ASO SA O LE TALA LELEI**

Tusi Faitau: Luka 6:1-5

Matua: Luka 6:5 – *“Ua fetalai atu foi o ia iā te i latou, ‘O le atalii o le tagata, o le Alii lea o le sapatī.’”*

Manatu Autu: **“IA FAIA GALUEGA O LE ALOFA”**

Tatou Faafetai i le Atua: -

1. Ona o Iesu Keriso ole tulafono o le alofa ia, ua mafai ai e Kerisiano ona tala'i lea tala lelei i le lalolagi.
2. Ona o le tala lelei o le alofa tunoa o Iesu Keriso, ua mafai ai e matua ona aoaoina fanau ma aiga.
3. Ona o Iesu Keriso ua faamanatu mai e le o le tulafono a'o le alofa e sili lea. Ua maua e le Ekalesia avanoa lelei e tala'i ai lenei tala lelei mo le ola faatuatua o ona tagata.

Tatou Faatoese i le Atua: -

1. Ona o le mapo tulafono o le tagata Kerisiano.
2. Pe afai ua faamamafa e matua le tulafono i fanau ma totonu o aiga, ae le o le aoaoga lea a Keriso mo le faaolataga.
3. Ona o le Ekalesia ua faamamafa mataitusi o le tulafono a ua le faatāua le auga o le faaolataga mo le atunuu, o le alofa o Keriso.

Tatou Tatalo i le Atua: -

1. Ina ia avea i tatou ma tausī alofa a le Atua.
2. Ina ia usitai ma faatino e matua le alofa i fanau ma aiga.
3. Ina ia avea le Ekalesia e faataunuu le alofa mo le atunuu/tagata uma.

## **SETEMA 12 – VAIASO SA SEFULU LIMA TALU LE PENETEKOSO**

Tusi Faitau: Luka 6:43-45

Matua: Luka 6:43 – *“E leai foi se la'au lelei e fua mai i fua leaga; e leai foi se la'au leaga e fua mai i fua lelei.”*

Manatu Autu: **“SUESUE IFO I LOU LOTO”**

Tatou Faafetai i le Atua: -

1. Ona o Iesu Keriso o le fua lelei o le faamoemoe o Kerisiano uma.
2. Ona o Iesu Keriso ua faamanatu mai tu ma aga a matua e tatau ai mo le tausīa o fanau ma aiga.



3. Ona o Iesu Keriso ua faamanatu mai o le Ekalesia o le fua lelei mo le atunuu ma ona tagata.

Tatou Faatoese i le Atua: -

1. Ona o tatou tagata Kerisiano i le tele o taimi ua fua mai fua leaga i mea e faia.
2. Ona ua vaivai matua e faatino tu ma aga o le loto lelei mo fanau.
3. Ona o le Ekalesia ua le fesili i le Atua i ala e faatino ai tiute o se laau lelei e fuaina le loto ma mea lelei mo le atunuu.

Tatou tatalo i le Atua: -

1. Ina ia faamalosi le faatuatua o tatou tagata Kerisiano i le Atua, o le laau lelei e tupu mai ai amio Lelei.
2. Ina ia mausali le faatuatua ma le faamaoni i matua e a'oa'o fanau i le amio ma aga a Keriso.
3. Ina ia galue le Ekalesia e fafaga agaga o le atunuu i fua lelei ua aoaina e Iesu Keriso, ia le gata i le loto a'o amio ia taulai i le Atua.

## **SETEMA 19 – VAIASO SA SEFULU ONO TALU LE PENETEKOSO**

Tusi Faitau: Luka 8:4-15

Matua: Luka 8:8 – *“Ua pa’u foi isi i le eleele lelei; ua tupu, ua fua mai taiselau i fua.” Ua fetalai atu ia i nei mea, ona alaga atu lea, “O le ua i ai taliga e faalogo ai, ina faalogo mai ia o ia.”*

Manatu Autu: **“O LOTO E TALIA LE UPU O LE OLA”**

Tatou Faafetai i le Atua: -

1. Ona o le saolotoga ua tuuina i Kerisiano latou te filifili ai i lana UPU mo le ola i aso uma.
2. Ona o le UPU ua luluina i totonu o aiga e taitaiina ai i le ola mo Keriso.
3. Ona o le UPU na maliu ma toe tu manumalo mai le oti, ua avanoa ai le Ekalesia e luluina e soifua ai le atunuu ma ona tagata i aso uma.

Tatou Faatoese i le Atua: -

1. Ona ua tatou le taliaina le UPU a le Atua e ola ai.
2. Ona ua le faaaogaina e matua le UPU e fafaga ai fanau ma aiga.
3. Ona ua le faatauaina e le Ekalesia le UPU o le tala lelei ia Iesu Keriso e talia ma usitai i ai.

Tatou Tatalo i le Atua: -

1. Ina ia faaosofia o tatou tagata e galulue ma le faamaoni e faatino le finagalo o le Atua, i le taitaiga a le UPU.
2. Ina ia manino le faalogo ma lagona e matua le UPU ma lana taitaiga e atiina ae ai fanau ma aiga.
3. Ina ia talia e le Ekalesia le UPU sa luluina e Keriso e tapasa ai lana misiona i le lalolagi.

## **SETEMA 26 – VAIASO SA SEFULU FITU TALU LE PENETEKOSO**

Tusi Faitau: Luka 9:43-45

Matua: Luka 9:44 – *“Ia outou matua faalogologo i nei upu, auā o le a tuuina atu le Atalii o le tagata i lima o tagata.”*

Manatu Autu: **“O LE FAALATA O LOO I O TATOU LOTO”**

Tatou Faafetai i le Atua: -

1. Ona o le faamaoni o lona alofa i le tagata Kerisiano e ui lava ina o loo faalata pea iā Iesu.
2. Ona o le agalelei o le Atua e ala i lona Alo o Iesu Keriso ua faamanatu pea i matua ma aiga ia tumau le faatuatua.
3. Ona o le Keriso ua maliu ma toe tu ina ia aoaoina le Ekalesia o le talitonu ma faia le finagalo o Keriso e manumalo ai mai faaosoosoga a le tiapolo.

Tatou Faatoese i le Atua: -

1. Ona o loo fetina’iina pea le talitonuga o le Kerisiano ia Iesu ma le fananau o aga a le tino.
2. Ona o le lē aoaoina e matua o fanau ma aiga i le leaga o le ola femoumoua’i ae le tumau i le Keriso.
3. Ona o le Ekalesia i lona faalataina pea o lona Matai ma faiaina ai i maili a le fili.

Tatou Tatalo i le Atua: -

1. Ina ia faatuputeleina lo tatou talitonu ma le faalagolago i le Atua soifua.
2. Ina ia talitonu matua i le Atua ma faailoa ai i fanau ma aiga lana faaolataga.
3. Ina ia talitonu le Ekalesia ma le atunuu o le faalogo ma le usitai i le Atua ma lona finagalo o le ala lea o le manuia o taumafaiga uma.

### **OKETOPA 3 – VAIASO SA SEFULU VALU TALU LE PENETEKOSO**

Tusi Faitau: Luka 10:17-24

Matua: Luka 10:20 – *“Ae peita’i, ‘aua tou te olioli i lenei mea, ina ua usiuitai agaga ia te outou; a ia olioli ona ua tusia o outou igoa i le lagi.”*

Manatu Autu: **“O LE MANUIA O LE GALULUE MO LE ALII”**

Tatou Faafetai i le Atua: -

1. Ona o le manuia ua maua e Kerisiano o loo galulue mo le Atua ma lana faaolataga.
2. Ona o lona tamaoaiga i le agaga o loo tupu ai pea le olioli o matua e a’oa’o fanau i le tala o le faaolataga ia Iesu Keriso.
3. Ona o le faatinoga e le Ekalesia o le galuega talai mo le manuia o le atunuu.

Tatou Faatoese i le Atua: -

1. Pe afai ua faafefeteina Kerisiano i le galuega talai ae le faafoi le viiga i le Atua o le matai o le galuega.

2. Ona ua faaviivii matua i lo latou lava potō i le aoaoina o fanau ae le faafoi le faafetai i le Atua.
3. Pe afai ua sese le faamamafa a le Ekalesia i mea e mitamita ai ua avea ma auala e faatalalē ai i ona tiute.

Tatou Tatalo i le Atua: -

1. Ia manuia Kerisiano uma ma le galuega talai i le lalolagi.
2. Ia fesoasoani lona Agaga i le galuega talai a matua i totonu o aiga.
3. Ia mautinoa e le Ekalesia o le galuega tala'i e le mo se aso e tasi, a o aso uma lava.

## **OKETOPA 10 – A O LUMANAI LE ASO SA LOTU TAMAITI**

Tusi Faitau: Luka 11:17-28

Matua: Luka 11:23 – “O se le ‘au ia te a’u, e ‘au ese lea ia te au; o se le faaputu faatasi ma a’u, e faataapeape lea.”

Manatu Autu: **“IA TATOU ‘AU MA IESU E MANUMALO AI”**

Tatou Faafetai i le Atua: -

1. Ona o Iesu Keriso ma lona soifua usitai ua aoaoina ai Kerisiano e usitai ma fai lona finagalo.
2. Ona o aoaoga ua malosi ai le leo o matua i le aoaoina o fanau ma aiga ia faalogo ma faia le finagalo o le Atua.
3. Ona o lona alofa tunoa ua laveaiina ai le Ekalesia i taimi e faaputu ai faatasi ma temoni.

Tatou Faatoese i le Atua: -

1. Pe afai ua fefefe Kerisiano i temoni ua muta ai le talaiina o le finagalo o le Atua i le lalolagi.
2. Ona ua osofia e le palaai matua ua nofonofo lava a ua faatamaia e le tiapolo fanau ma aiga.
3. Ona ua vaivai le Ekalesia e faamuta le faatosina ma faatauga oloa a le fili.

Tatou Tatalo i le Atua: -

1. E faatupu le loto lelei i Kerisiano e tulai ai ma le malosi e tau le taua lelei mo Keriso ma faaolaina ai le lalolagi.
2. Ina ia lototele matua e faaoga auupega a Keriso e tau ai le taua ma le fili ina ia saogalemu fanau ma aiga.
3. Ina ia iloa e le Ekalesia ua na o le mana o le Atua e mafai ai ona tau le taua e faiaina ai le fili ma ana au i totonu o le atunuu.

## **OKETOPA 17 – VAIASO SA LUA SEFULU TALU LE PENETEKOSO**

Tusi Faitau: Luka 12:8-12

Matua: Luka 12:10 – “O se lafo foi se upu i le Atalii o le tagata, e faamagaloina lea; a o le faifai i le Agaga Paia, e le faamagaloina lea.”

Manatu Autu: **“O LE AGASALA E LE FAAMAGALOINA”**

Tatou Faafetai i le Atua: -

1. Ona o le faamalosi o le Agaga Paia i Kerisiano ua mafai ai ona talai le Keriso toe tu e aunoa ma le matamuli pe fefe.
2. Ona o le Agaga Paia ma lana taitaiga i matua ua a'oa'o ai pea fanau ma aiga ia ola ma usitai i le finagalo o Keriso.
3. Ona o le galuega faaola a Iesu e lei matamuli pe fefe i le faailoa mai i le Ekalesia o le Atua lava e manuia ai le atunuu.

Tatou Faatoese i le Atua: -

1. Auā ua matamumuli Kerisiano e faailoa Keriso lo tatou faaolataga.
2. Ona o matua ua le fesoasoani i fanau ma aiga ina nei pepelo ma faatiti i le suafa o Iesu Keriso, pe a feagai ma faaoleole a le o loo leaga.
3. Ona o le Ekalesia aua ua lei se faamoemoe i le Agaga Paia mo le upu moni e malolosi ai le atunuu i le taua ma fualaa faasaina ua afaina ai fanau ma aiga.

Tatou Tatalo i le Atua: -

1. Ina ia a'oa'o mai le Agaga o le Atua ia aua nei faafitia e Kerisiano le Alii o Iesu Keriso i le lalolagi.
2. Ina ia faaaogaina matua e le Agaga Paia i ona ala e faataitai i ai fanau ma aiga o le suafa lava o Iesu Keriso le ala o manuia.
3. Ia avea le Ekalesia o se Ekalesia e ava ma faaaloalo ae le faifai ma ulagia le Agaga Paia. Ma ia faapea foi i le atunuu ma ona tagata.

## **OKETOPA 24 – VAIASO SA LUA TASI TALU LE PENETEKOSO**

Tusi Faitau: Mataio 22:34-46

Matua: Mataio 22:37-39 – *“Ona fetalai atu ai lea o Iesu ia te ia, ‘E te alofa atu i le Alii lou Atua ma lou loto atoa, ma lou agaga atoa, ma lou manatu atoa. O le poloaiga muamua lena ma le sili. E faapena foi lona lua. E te alofa atu i le lua te tuaoi ia faapei o oe lava ia te oe.’”*

Manatu Autu: **“O LE A LE MANAO O LE ATUA?”**

Tatou Faafetai i le Atua: -

1. Ona o Iesu Keriso o loo faamanatu pea i Kerisiano le finagalo o le Atua e ao ona faia e tagata uma.
2. Ona o le faaolataga ua saunia ua mafai ai e matua ona a'oa'o fanau ma aiga ia alolofa i le Atua, ia alolofa foi i tuaoi. O le agalelei lava lea i soo se tasi.
3. Ona o le Ekalesia ma lona taitaiina o le atunuu ia alolofa i le Atua ma soo se tagata, o ala ia o le tagata ua faaolaina e Keriso Iesu.

Tatou Faatoese i le Atua: -

1. Ona ua le faatinoina e le Kerisiano le mea o loo finagalo i ai le Atua mo lona ola valaauina i lenei lalolagi.
2. Ona o matua ua le ta'uta'u pea i fanau ma aiga le finagalo o le Atua ia faatino le alofa ia te ia ma soo se tasi i aso uma.

3. Ona ua vaivai le talaiga e le Ekalesia i tagata o le atunuu le mea o finagalo i ai le Atua: O le alofa i le Atua ma alofa i soo se tasi.

Tatou Tatalo i le Atua:

1. Ina ia manino i le Kerisiano lona autu i aso uma e pei ona faamanatu mai e Keriso: O le faatinoina lea o le alofa ma le agalelei i taimi ma aso uma i le mafai e mafai ai.
2. Ina ia aoaoina e matua fanau ma aiga i lenei feau taua.
3. Ina ia lototele le Ekalesia i lona talai ma faatino le mea o manao i ai le Atua o se vaega taua o lana talaiga.

### **OKETOPA 31 – VAIASO SA LUA LUA TALU LE PENETEKOSO**

Tusi Faitau: Mataio 23:1-12

Matua: Mataio 23:11-12 – *“A o le sili ia te outou ia fai lea ma a outou auauna. O se faamaualuga o ia iā te ia, e faamaualoina lea; a o se faamaulalo o ia iā te ia, e faamaualugaina lea.”*

Manatu Autu: **“O AUAUNA LAVA I TATOU A LE ALII”**

Tatou Faafetai i le Atua; -

1. Ona o Iesu Keriso o le auauna loto maualalo. O le ala mo soo se Kerisiano ma le valaauina e fai le finagalo o le Atua.
2. Ona o matua ma le auaunaga i le Atua e ala i le a’oa’o o fanau ma aiga; e faaeaina le auauna faamaoni.
3. Ona o le Ekalesia o loo faailoa i ana galuega le auaunaga i le Atua ma le loto maualalo ao taitaiina pea le atunuu e auauna ia Iesu Keriso o le ola.

Tatou Faatoese i le Atua: -

1. Ona o loo faia pea e Kerisiano le galuega faa-Faresaio o le lauga atu i le alofa o le Atua ae le mulimuli ai.
2. Ona o matua ua le fai se faataitaiga lelei i fanau ma aiga, a ua tausolomua le inu ava ma faaaoga fualaa faasaina.
3. Ona ua faaaoga e le Ekalesia lona tulaga e folafola ai ae le faia, e faafefeteina ai le vaiga, ma taualoa ai i le va fealoaloai a ua leai se auaunaga mo le atunuu e pei ona valaauina a e Keriso.

Tatou Tatalo i le Atua: -

1. Ina ia faia e Kerisiano le auaunaga e tusa o le faataitaiga a Iesu Keriso.
2. Ina ia aoaoina e matua fanau i le ola galulue ma auauna e atiina a’e aiga ma le galuega a Keriso Iesu.
3. Ina ia puea le Ekalesia i le lotomaualalo e tupu ai le lototele e faia le finagalo o le Atua. Ia aua lava nei talaoole, pe faafefeteina, pe fiasili ae sagai ane e taitai le atunuu ia muamua le Atua.

### **NOVEMA 7 – VAIASO SA LUA TOLU TALU LE PENETEKOSO**

Tusi Faitau: Iosua 24:14-25

Matua: Iosua 24:24 – *“Ona fai mai ai lea o le nuu ia Iosua, “Matou te auauna i le Alii lo tatou Atua; matou te faalogo foi i lona siufofoga.”*

Manatu Autu: **“AUAUNA MA FAALOGO I LE ALII”**

Tatou Faafetai i le Atua: -

1. Ona o Ia o le Atua alofa e ui ina fultua le tagata ia te ia i le tele o taimi.
2. I lona le tau ma sui i le faaletonu o le tagata. A ua aoa’i mai le tagata ina ia liliu ese i le leaga.
3. Ona o le atoatoa o lona alofa e ala ia Iesu Keriso lona Alo e toatasi ua faia le togioala i lona soifua ofoina mai.

Tatou Faatoese i le Atua: -

1. Ina ua avea mea o le olaga e malie ai o tatou mana’o ma atua ua tatou fialia ma lotu atu i ai.
2. Ina ua avea i tatou ma auauna e le faalogo i le Alii ma lona finagalo.
3. Ina ua faaali mai e Keriso le uiga o le avea ma auauna, a ua le faaaoao i ai i tatou.

Tatou Tatalo i le Atua: -

1. Ia avea i tatou ma auauna e faalogo i le Alii ma faia lona finagalo.
2. Ia faailoa mai pea e le Agaga Paia i le Ekalesia lona tulaga faa-auauna, ma ia usita’i i le finagalo o le Matai o le Galuega.
3. Ia pa’ia ia i tatou fe’au a le Alii ma ana poloaiga ia fai ma fiafiaga i o tatou lotu.

## **NOVEMA 14 – VAIASO SA LUA FA TALU LE PENETEKOSO**

Tusi Faitau: 1 Tesalonia 5:1-11

Matua: 1 Tesalonia 5:5 – *“O tagata o le malamalama outou uma lava, ma tagata o le ao; tatou te le o i le po ma le pouliuli.”*

Manatu Autu: **“O I TATOU O TAGATA O LE AO, AE LE O LE PO”**

Tatou Faafetai i le Atua: -

1. Ona o le malamalama o Keriso, ua avea ma malamalama o le lalolagi.
2. Ina ua avea i tatou ma tagata o le malamalama ae le o le pouliuli e ala i le malamalama o Keriso.
3. I le valaauina o i tatou e faasusulu atu lo tatou malamalama, o tatou uiga lelei i le lalolagi, ina ia viia ai Keriso.

Tatou Faatoese i le Atua: -

1. Ona ua avea pea o tatou ma tagata o le po i o tatou uiga tuai ma le faia pea o le agasala.
2. Ona ua solomua lava i tagata Kerisiano ona avea ma tagata o le po.
3. Ona ua tetele galuega a le pouliuli i nei aso ina ua vaivai o tatou tagata faatuatua e faasusulu atu le malamalama o Keriso i le lalolagi.

Tatou Tatalo i le Atua: -

1. Ia maua le faatuatua i o tatou tagata e talia ai le malamalama o le Atua, ma atagia ai i le vaai mai o le lalolagi.

2. Ia faaaaupegaina e le Agaga Paia le Ekalesia i lona tiute o le faasusulu atu o le malamalama o Keriso i le pogisa.
3. Ia fiafia le lalolagi e o mai i le malamalama, ae le o le nonofo ai pea i le pouliuli.

## **NOVEMA 21 – VAIASO SA LUA LIMA TALU LE PENETEKOSO**

Tusi Faitau: Salamo 100

Matua: Salamo 100:3 – *“Ia outou iloa o le Alii o ia lava le Atua; o ia na faia i tatou, ua fai i tatou mona; o lona nuu i tatou, o le lafu mamoe ua ia fagaina.”*

Manatu Autu: **“O LE ATUA NA FAIA I TATOU: O LONA NUU MA LANA LAFU MAMOE”**

Tatou Faafetai i le Atua: -

1. Ona o Ia lava na faia i tatou ma ua fai i tatou mona.
2. Ona ua avea i tatou mona nuu ma le lafu mamoe ua ia tausii ai.
3. Ona ua tatou molimauina pea lona faamaoni ma lona onosai.

Tatou Faatoese i le Atua: -

1. Ona ua le tusa lava le agalelei mai pea o le Atua ma lo tatou tali atu i lona alofa mai.
2. Ona ua fai i tatou ma nuu o le Atua, a ua le avea o Ia ma o tatou Atua.
3. Ona ua faasaga i tatou i o tatou lava ala e pei o mamoe ua se, a ua le foi mai i Le na faia i tatou.

Tatou tatalo i le Atua: -

1. Ina ia avea i tatou uma ma e vivii i le Atua i aso uma i lona agalelei tele mai ia i tatou.
2. Ina ia tumau ma avea i tatou ma nuu o le Atua, ma tumau ma avea foi le Atua ma o tatou Atua.
3. Ia mitamita le Ekalesia i le Atua ina ua fai o Ia ma Leoleo Mamoe lelei, ma Le faafoisia le agaga i ona tagata.

## **NOVEMA 28 – A O LUMANAI LE ASO SA MUAMUA O LE ATIVENI**

Tusi Faitau: 1 Korinito 1:3-9

Matua: 1 Korinito 1:7 – *“O lea ua outou le matitiva ai i se mea alofa e tasi; a o faatalitali outou i le faaaliga o lo tatou Alii o Iesu Keriso.”*

Manatu Autu: **“E LEAI SE MATIVA I LE ALII O IESU KERISO”**

Tatou Faafetai i le Atua: -

1. I lona tamaoaiga ua taumasuasua ai a tatou ipu i lona foai mai.
2. I le lautele ma le maualuga o lona alofa e aofia ai le lalolagi atoa ma ona tagata i lana tausiga.
3. Ona o le ala e tasi ua ia saunia, o Iesu Keriso, ua malie ai o tatou loto i lona tamaoaiga sili.

Tatou Faatoese i le Atua: -

1. Ona ua gata lo tatou fiafia i tamaoaiga o le tino, ae ua matitiva pea i le faaleagaga.
2. Ona ua galo ia i tatou o loo tele le tamaoaiga i le maota o lo tatou Tama o i le lagi, a ua le saili i ai.
3. Ona ua le faatalitali ma le onosai i tatou i le faaali mai o Keriso ma lona finagalo mo i tatou.

Tatou Tatalo i le Atua: -

1. Ia tatou maua le agaga faatalitali ma le mautinoa i le Alii i lenei vaitau o le Ativeni.
2. Ia faaavanoa loto o tatou tagata e vaavaai ai ma le faatuatua i le Alii o le a afio mai.
3. Ia a'oa'o mai ia tatou iloa o lo tatou matitiva e afua mai i lo tatou fulitua i le Alii.

### **TESEMA 5 – A O LUMANAI LE ASO SA LONA LUA O LE ATIVENI**

Tusi Faitau: Isaia 40:1-11

Matua: Isaia 40:9 – *“Alu ae i le mauga maualuga, o oe lē au mai le tala lelei ia Siona; ia matuā leo tele, o oe lē au mai le tala lelei ia Ierusalem; ia leo tele, aua le fefe; fai atu i aai o Iuta, Faauta i lo outou Atua.”*

Manatu Autu: **“LEO TELE OE LE AVE FEAU O FAAMOEMOEGA TAUNUU”**

Tatou Faafetai i le Atua: -

1. Ona o le Atua e faamaoni i ana folafolaga uma.
2. Ona o galuega o le saolotoga e afua mai i lona finagalo alofa.
3. Ona ua tatou mautinoa, o ē pologa ma sauaina e pele i latou i le finagalo o le Atua.

Tatou Faatoese i le Atua: -

1. Ona ua tatou leo itiiti i le faailoa atu o vavega tetele ua faia e le Atua.
2. Ona ua tatou palaai e fai atu i le lalolagi, “Faauta i lo outou Atua.”
3. I le masalosalo o tatou loto i le Atua ma lona mana e faataunuu mea uma e finagalo i ai.

Tatou Tatalo i le Atua: -

1. Ia maua le lototele i ana ave feau e matua leo tetele e faailoa le finagalo o le Matai.
2. Ia saunia loto uma e talia le Atua o le Ola ma le Atua o le Saolotoga.
3. Ia faatali ma le mautinoa le lalolagi ma tagata uma i le Atua o le a afio mai e ala ia Iesu Keriso.

### **TESEMA 12 – A O LUMANAI LE ASO SA LONA TOLU O LE ATIVENI**

Tusi Faitau: Luka 1:46-55



Matua: Luka 1:46 – *“Ua vivii atu lo’u loto i le Alii, ua olioli foi lo’u agaga i le Atua lo’u Faaola.”*

Manatu Autu: **“O LE LOTO UA FIAFIA MA LE PESE O LE OLIOLI”**

Tatou Faafetai i le Atua: -

1. Ona o ana fuafuaga loloto ua fai ma pese o le olioli mo e talitonu ma faatuatua i lona suafa.
2. I lona filifilia pea o tagata faatuatua ma le loto maualalo mo lona finagalo alofa i le lalolagi.
3. Mo le aumaia o le loto talitonu tatou te talia ai ma le faatuatua lona faaali mai e ui i le faigata ona tatou talia.

Tatou Faatoese i le Atua: -

1. I lo tatou faaaoaga o le poto faalelalolagi e fesiligia ai le finagalo o lo tatou Atua.
2. Ona ua tatou savavali i mata o le tino ae le o mata o le faatuatua.
3. Ona o vavega i aso fai soo ua le manatu ma avea ma ala e olioli ma fiafia ai i le Alii.

Tatou Tatalo i le Atua: -

1. Ia tupu le olioli ma le fiafia i o tatou tagata e viia ai le Atua i lenei vaitau o le afio mai o le Atua.
2. Ia olioli le au Kerisiano i le afio mai o le Atua e ala ia Iesu Keriso.
3. Ia le faaititiia le alaga fiafia ma le pese o le olioli i o tatou loto i lo tatou Atua ma lona silisili ese.

## **TESEMA 19 – A O LUMANAI LE ASO SA LONA FA O LE ATIVENI**

Tusi Faitau: Luka 1:26-38

Matua: Luka 1:31 – *“Faauta foi, o le a to oe, ma e fanauina se tama tane, e te faaigoa ia te ia o Iesu.”*

Manatu Autu: **“IESU: TAMA O LE FOLAFOLAGA”**

Tatou Faafetai i le Atua: -

1. Ona o lona alofa tunoa ua faaalua lea i lona liutinotagata e ala ia Iesu, le tama o le folafolaga.
2. I le ala maualalo ua ia filifilia e afio mai ai i le lalolagi.
3. Ona o Iesu o le a fai o ia ma faaola o le lalolagi.

Tatou Faatoese i le Atua: -

1. Ona ua sese la tatou faamamafa i fiafiaga o le olaga i lenei vaitau, ae le o le Keriso.
2. Ona o le vaitau o mafutaga i aiga, matua ma fanau, ae ne’i avea ma vaitau o le femisa’i ma le fefulituaa’i.
3. Ina ua avea lo tatou femoumoua’i ma ala ua leai ai se avanoa o le Alii i o tatou loto.

Tatou Tatalo i le Atua: -

1. Ia avea pea Iesu ma Alii ma Faaola i loto ma agaga o le au faatuatua uma lava.

2. Ia lagona e tagata uma le taua o le ola fai meaalofa o le tasi i le isi, e pei ona faia e le Atua i le lalolagi e ala ia Iesu.
3. Ia a’oa’oina i tatou uma, o meaalofa ia tau lava o lo tatou talia ma le faafetai. E le tauia.

## **TESEMA 26 – VAIASO SA MULIMULI O LE TAUSAGA**

Tusi Faitau: Salamo 148

Matua: Salamo 148:11, 13 – *“O tupu o le lalolagi, ma nuu atoa uma lava; o alii ma faamasino uma o le lalolagi, ia latou vivii atu i le suafa o le Alii, aua ua na o lona suafa e mamalu; o lona viiga ua sili lea i le lalolagi atoa ma le lagi.”*

Manatu Autu: **“UA VALAAUINA MEA UMA IA VIVII ATU I LE ALII”**

Tatou Faafetai i le Atua: -

1. Ona ua toe o ni aso ona faai’u lea o lenei tausaga, a o tumau pea lona alofa ia i tatou.
2. I le faapalepale o lona alofa ua talia ai pea o tatou tagata le atoatoa.
3. Ona o avanoa na aumai i lenei tausaga atoa tatou te galulue ai mo la ma lana tala lelei.

Tatou Faatoese i le Atua: -

1. Ina ua vaivai o tatou tagata e ofoina pea i le Alii lona viiga i taimi ma aso uma.
2. Ina ua faavaivai o tatou tagata i le galuega a le Atua i lenei tausaga a uma atu.
3. Ona ua fao pea e le tagata le mea e ono i le Atua: O le viiga.

Tatou Tatalo i le Atua: -

1. Ina ia lagona pea e le tagata lona uluai valaauina: O le vivii i le Atua e le aunoa.
2. Ina ia auai le ekalesia faatasi ma le foafoaga ma mea uma lava e vivii i le Atua.
3. Ina ia faamanuia le Atua i a tatou galuega faauma o lenei tausaga, aemaise galuega faufuaina o le tausaga fou.

**IA MANUIA LE TAUSAGA FOU 2021!**